

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренцијски савет

RJEŠENJE

po Prijavi namjere koncentracije između privrednih subjekata Intersnack International B.V., Nizozemska i Kelly Gesellschaft mbH, Austrija

Sarajevo
Februar 2008. godine



Broj: 01-01-26-041-10-II/07
Sarajevo, 19.02.2008. godine

Na osnovu člana 25. stav (1) tačka e), člana 42. stav (1) tačka d) i člana 43 stav (2), a u vezi s čl. 12., 14., 16., 17. i 18. Zakona o konkurenciji («Službeni glasnik BiH», br. 48/05 i 76/07), a po Prijavi namjere koncentracije privrednog subjekta Intersnack International B.V., Vaartweg 158, 8243 PP Lelystad, Nizozemska i privrednog subjekta Kelly Gesellschaft mbH, Hermann-Gebauer-Strasse 1. 1220 Beč, podnesenoj po advokatu Seadu Miljkoviću, Fra Anđela Zvizdovića 1, 71000 Sarajevo, dana 04.12.2007. godine broj: 01-01-26-041-II/07, Konkurencijsko vijeće, na 61. (šezdeset i prvoj) sjednici održanoj dana 19.02.2008. godine, je donijelo

R J E Š E N J E

1. Ocjenjuje se dopuštenom koncentracija na tržištu slanih trajnih peciva u Bosni i Hercegovini koja nastaje indirektnim sticanjem 99,9% dionica u privrednom subjektu Kelly Gesellschaft mbH, Hermann-Gebauer-Strasse 1. 1220 Beč, Austrija od strane privrednog subjekta Intersnack International B.V., Vaartweg 158, 8243 PP Lelystad, Nizozemska.
2. Ovo Rješenje o koncentraciji se upisuje u Registar koncentracija.
3. Ovo Rješenje je konačno i bit će objavljeno u «Službenom glasniku BiH», službenim glasilima entiteta i Brčko Distrikta Bosne i Hercegovine.

O b r a z l o ž e n j e

Dana 04.12.2007. godine Konkurencijsko vijeće je zaprimilo Prijavu namjere koncentracije od strane privrednog subjekta Intersnack International B.V., Vaartweg 158, 8243 PP Lelystad, Nizozemska (dalje u tekstu: Intersnack ili Podnosilac prijave), kojeg zastupa advokat Sead Miljković, Fra Anđela Zvizdovića 1, 71000 Sarajevo, indirektnim sticanjem 99,9% dionica u privrednom subjektu Kelly Gesellschaft mbH, Hermann-Gebauer-Strasse 1. 1220 Beč, Austrija (dalje u tekstu: Kelly).

Uvidom u dostavljenu Prijavu namjere koncentracije (u daljem tekstu: Prijava) utvrđeno je da ista nije kompletna, te da je treba dopuniti u smislu člana 30. stav (1) Zakona o konkurenciji i Odluke o načinu podnošenja prijave i kriterijima za ocjenu koncentracija privrednih subjekata («Službeni glasnik BiH», broj 95/06), te je zatražena dopuna Prijave dana 17.02.2008. godine (akt broj: 01-01-26-041-2-II/07). Podnosilac prijave je Prijavu

dopunio i traženu dokumentaciju dostavio dana 11.01.2008. godine (akt broj: 01-01-26-041-5-II/07).

Po prijemu tražene dokumentacije Konkurencijsko vijeće je utvrdilo da je Prijava kompletna, te izdalo Potvrdu o prijemu kompletne i uredne Prijave, u skladu sa članom 30. stav (3) Zakona, dana 24.01.2008. godine pod brojem: 01-01-26-041-6-II/07.

Podnosilac Prijave je naveo da će Prijava predmetne koncentracije, osim u Bosni i Hercegovini, biti podnesena i konkurencijskim tijelima u Njemačkoj, Austriji i Bugarskoj. Savezni ured za privredno povezivanje u svrhu ograničenja konkurencije u Njemačkoj je već odobrio ovaj pravni posao.

Konkurencijsko vijeće je utvrdilo da je Prijava podnesena u Zakonom predviđenom roku u smislu člana 16. stav (1) Zakona.

Konkurencijsko vijeće u postupku ocjene predmetne koncentracije je utvrdilo sljedeće činjenice:

1. Učesnici koncentracije

Učesnici koncentracije su privredni subjekti Intersnack International B.V., Vaartweg 158, 8243 PP Lelystad, Nizozemska i Kelly Gesellschaft mbH, Hermann-Gebauer-Strasse 1. 1220 Beč, Austrija.

1.1. Intersnack

Privredni subjekt Intersnack International B.V., Vaartweg 158, 8243 PP Lelystad, je društvo sa ograničenom odgovornošću, registrovano u Registru privrednih društava kod Privredne komore Flevoland, Nizozemska, pod brojem registracije 09159572. Privredni subjekt Intersnack International B.V. je holding društvo i svi udjeli društva Intersnack B.V. su u vlasništvu Intersnack Knabber Gebäck GmbH & Co KG, SR Njemačka.

Privredni subjekt Intersnack proizvodi i prodaje sljedeća slana trajna peciva: pržene ploškice od krompira, slane biskvite, specijalne proizvode (ekstrudirani proizvodi, krompirov čips, grickalice, kokice, tortilla čips, grickalice od tijesta) i slane jezgre. Slana trajna peciva koja proizvodi Intersnack prodaju se u velikom broju zemalja (a samo u ograničenim količinama i u BiH) pod brendovima Chio, funny-frisch, Pom-Bär, Goldfischli i drugim tržišnim markama. Privredni subjekt Intersnack također proizvodi i proizvode za treće strane koji se prodaju pod imenima ovih trećih strana tj. privatne oznake supermarketa.

Privredni subjekat Intersnack u vlasništvu nema 10% ili više kapitala/udjela ili prava glasa u bilo kojem pravnom subjektu u BiH, niti ima pravnih subjekata na relevantnom tržištu u kojima su članovi uprave/nadzornog odbora u isto vrijeme i članovi uprave/nadzornog odbora Intersnack-a.

1.2. Kelly

Privredni subjekat Kelly Gesellschaft m.b.H. je društvo sa ograničenom odgovornošću, sa sjedištem u Hermann-Gebauer-Strasse 1, 1220 Beč, Austrija. Registrovano je dana 09.07.1965. godine u Registru privrednih društava Privrednog suda Beč pod brojem

registracije FN 108978m. Privredni subjekat Erste Kelly Beteiligungsgesellschaft m.b.H., Schuberting 6, AT-1010 Beč, Austrija je vlasnik 99,9% udjela u privrednom subjektu Kelly.

Privredni subjekt Kelly proizvodi i prodaje širok spektar slanih trajnih peciva: pržene ploškice od krompira, slani biskviti, specijalne proizvode (ekstrudirani proizvodi, kokice, tortilla čips, itd.) i slane jezgre. Kelly svoje proizvode prodaje uglavnom u Austriji pod tržišnim markama Kelly i Soletti, a također proizvodi peciva za treće strane koje ove proizvode prodaju pod vlastitim oznakama.

Privredni subjekt Kelly posluje u Bosni i Hercegovini i drugim zemljama u jugoistočnoj i istočnoj Evropi, putem supsidijarnog društva Kelly South East Europe d.o.o. Zavidovići (dalje u tekstu: Kelly SEE)

1.3 Kelly South East Europe d.o.o. Zavidovići

Kelly South East Europe d.o.o. Zavidovići, je društvo sa ograničenom odgovornošću, sa registrovanim sjedištem u Zavidovićima, Vožuća bb, registrovano u Registru privrednih društava kod Opštinskog suda u Zenici pod brojem registracije 1-9325.

Kelly SEE je vlasnik fabrike krompirovog čipsa koja se nalazi u Zavidovićima, Vožuća bb. Osnovne djelatnosti subjekta Kelly SEE su obrada i čuvanje krompira (proizvodnja čipsa), proizvodnja skroba i proizvoda od skroba, veleprodaja voća i povrća, kao i druge povezane djelatnosti koje se odnose na proizvodnju čipsa. Direktor subjekta Kelly SEE, Haris Abdurahmanović, Brčanska 16, 71000 Sarajevo, je ujedno i direktor privrednog subjekta Lora d.o.o. Sarajevo.

2. Ukupni prihod učesnika koncentracije

U smislu odredbe člana 14. stav (1) tačka a) Zakona, obaveza prijave namjere koncentracije privrednih subjekata postoji ako ostvareni ukupni godišnji prihod učesnika koncentracije, ostvaren prodajom roba i/ili usluga na svjetskom tržištu, iznosi preko 100.000.000,00 KM, po završnom računu u godini koja je prethodila predmetnoj koncentraciji.

Ukupni godišnji prihodi učesnika koncentracije na dan 31.12.2006. godine prikazani su u Tabeli 1.

Tabela 1.

	Intersnack	Kelly
Svijet	(..)* ¹ KM	(..)* KM
Bosna i Hercegovina	(..)* KM	(..)* KM

Time su ispunjeni uslovi iz člana 14. stav (1) tačka a) Zakona, jer ukupan zajednički godišnji prihodi učesnika koncentracije iznosi preko 100.000.000,00 KM, po završnom računu u godini koja je prethodila predmetnoj koncentraciji. Privredni subjekt Kelly indirektno posjeduje vlasničke udjele u privrednom subjektu Kelly South East Europe d.o.o. Zavidovići, Vožuća bb, Zavidovići, BiH, čime je ispunjen i drugi uslov - da je

¹ (..)* - podaci predstavljaju poslovnu tajnu, u smislu člana 38. Zakona o konkurenciji

najmanje jedan privredni subjekt učesnik koncentracije registrovan na teritoriji Bosne i Hercegovine.

3. Pravni osnov i oblik predmetne koncentracije

Pravni osnov predmetne koncentracije je Ugovor o prodaji i prenosu udjela potpisan dana 27.11.2007. godine (dalje u tekstu: Ugovor) između privrednog subjekta Intersnack i privrednog subjekta Erste Donau Verwaltungs GmbH. Nevedenim Ugovorom stranke su se sporazumjele da privredni subjekt Erste Donau Verwaltungs GmbH, u svojstvu prodavca, prodaje i prenosi svoj udio u društvu Kelly (indirektno putem društva Erste Kelly Beteiligungsgesellschaft m.b.H.) na subjekt Intersnack, u svojstvu kupca, pod uslovima navedenim u Ugovoru.

Namjeravanu transakciju će provesti privredni subjekt Erste Donau Verwaltungs GmbH, supsidijarno društvo u 100,0% vlasništvu privrednog subjekta Bank B. Metzler seel. Sohn & Co. u Frankfurt am Main, a koje je isključivi vlasnik društva Erste Kelly Beteiligungsgesellschaft mbH, čiji su udjeli neposredni predmet prodaje u skladu sa Ugovorom. Također, i subjekt Erste Kelly Beteiligungsgesellschaft m.b.H. kao direktni cilj predmetne koncentracije, i društvo Erste Donau, koje djeluje u svojstvu prodavca, su isključivo kontrolisani subjekti posebne namjene Bank B. Metzler seel. Sohn & Co. u Frankfurt am Main ("Bankhaus Metzler"). Oba subjekta djeluju u svojstvu holding subjekata i nisu aktivni učesnici na tržištu. Prema tome, stvarni cilj ovog pravnog posla je društvo Kelly, koje je 99,9% vlasništvo privrednog subjekta Erste Kelly Beteiligungsgesellschaft mbH. Ugovorena kupoprodajna cijena za ovu transakciju iznosi ukupno (..)* KM ((..)* EUR).

U skladu sa članom 12. stav (1) tačka b) Zakona, pravni oblik ove koncentracije je indirektno sticanje 99,9% dionica u privrednom subjektu Kelly od strane privrednog subjekta Intersnack, a na osnovu Ugovora .

4. Relevantno tržište predmetne koncentracije

Relevantno tržište, u smislu člana 3. Zakona, te čl. 4., 5. i 6. Odluke o utvrđivanju relevantnog tržišta («Službeni glasnik BiH», broj 18/06) čini tržište određenih proizvoda /usluga koje su predmet obavljanja djelatnosti na određenom geografskom tržištu.

Relevantno tržište proizvoda predmetne koncentraciji je tržište slanih trajnih peciva u Bosni i Hercegovini, koje uključuje pržene ploškice od krompira, slane biskvite, specijalne proizvode (npr. ekstrudirani proizvodi, krompirov čips, grickalice, kokice, *tortilla* čips, grickalice od tijesta) i slane jezgre.

Relevantno geografsko tržište predmetne koncentracije je teritorija Bosne i Hercegovine budući da učesnici predmetne koncentracije djeluju na istome.

Prema navedenom, pod relevantnim tržištem predmetne koncentracije Konkurenjsko vijeće podrazumjeva tržište slanih trajnih peciva na cijeloj teritoriji Bosne i Hercegovine.

4.1. Analiza relevantnog tržišta

Podnosilac prijave je u Prijavi namjere koncentracije dostavio podatke o tržišnom udjelu učesnika koncentracije na relevantnom tržištu, kao i tržišni udio njihovih konkurenata.

Izvor navedenih podataka je agencija za istraživanje GfK BH d.o.o., Skenderija 44, 71000 Sarajevo, Bosna i Hercegovina (u daljem tekstu:GfK)

U sljedećoj tabeli (tabela 2.) prikazani su tržišni udjeli učesnika koncentracije i njihovih konkurenata na relevantnom tržištu:

Tabela 2.

R. br.	Proizvođač	Količina (tona)	Količina (%)
1	Marbo, Srbija	(..)*	22,20
2	Kellys, Austrija	(..)*	6,40
3	Štark, Srbija	(..)*	8,70
4	Bambi Banat, Srbija	(..)*	12,50
5	Mogyi, Mađarska	(..)*	4,10
6	Swisslion, Švicarska	(..)*	5,40
7	Aleksandrija, Srbija	(..)*	4,50
8	Corn flips Majevisa, BiH	(..)*	3,00
9	Koestlin, Hrvatska	(..)*	3,70
10	Fritolay, SAD	(..)*	1,50
11	Unija inn, BiH	(..)*	2,40
12	Vispak, BiH	(..)*	2,10
13	Franck, Hrvatska	(..)*	1,00
14	Ostali	(..)*	22,50
15	UKUPNO	(..)*	100,00

Dakle, privredni subjekat Kelly ima udio na tržištu Bosne i Hercegovine od 6,4%, dok udio privrednog subjekta Intersnack na relevantnom tržištu iznosi manje od 1,0%, odnosno 0,7%, te iz tog razloga nije prikazan u Tabeli 2, već je uračunat pod stavkom 14. Tabele 2 - Ostali.

5. Procjena efekata predmetne koncentracije

U skladu sa članom 17. Zakona, Konkurencijsko vijeće je izvršilo analizu pozitivnih i negativnih efekata namjeravane koncentracije odnosno razmotrilo sve relevantne činjenice, te ocjenilo da se ovom koncentracijom ne stvara, odnosno ne jača dominantni položaj na relevantnom tržištu slanih trajnih peciva na teritoriji Bosne i Hercegovine.

Prema podacima o tržišnim udjelima učesnika koncentracije i njihovih konkurenata (Tabela 2.) vidljivo je da na relevantnom tržištu postoji jaka konkurencija, te predmetnom koncentracijom ne dolazi do značajne promjene tržišnih udjela, obzirom da je udio Intersnacka na relevantnom tržištu relativno nizak. Nakon provedenja koncentracije, udio privrednog subjekta Intersnack na tržištu u BiH dostigao bi 7,1% prema podacima agencije GfK, te je Konkurencijsko vijeće utvrdilo da predmetna koncentracija neće sprečavati, ograničavati ili narušavati tržišnu konkurenciju na relevantnom tržištu.

Prilikom ocjene predmetne koncentracije, Konkurencijsko vijeće je imalo u vidu i činjenicu da se u konkretnom slučaju radi o ex-teritorijalnoj koncentraciji, obzirom da

učesnici koncentracije djeluju na svjetskom nivou, te da predmetna koncentracija ima uticaj na tržištu Bosne i Hercegovine putem djelovanja registrovanog supsidijarnog privrednog subjekta Kelly SEE Zavidovići, te indirektno prodajom proizvoda iz asortimana učesnika predmetne koncentracije.

Prema navedenim podacima i činjenicama Konkurencijsko vijeće je odlučilo kao u dispozitivu ovoga Rješenja.

6. Administrativna taksa

Na ovo Rješenje podnosilac Prijave, u skladu sa članom 2 stav (1) tarifni broj 107 tačka d) pod 1) Odluke o administrativnim taksama u vezi s procesnim radnjama pred Konkurencijskim vijećem («Službeni glasnik BiH», broj 30/06) dužnan je platiti administrativnu taksu u ukupnom iznosu od 2.500,00 KM u korist Budžeta institucija Bosne i Hercegovine.

7. Pouka o pravnom lijeku

Protiv ovoga Rješenja nije dozvoljena žalba. Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objavljivanja ovoga Rješenja.

Predsjednik

Sanja Božić